

## PROBERT, ARTHUR REGINALD (1909-1975), gwleidydd Llafur

**Enw:** Arthur Reginald Probert  
**Dyddiad geni:** 1909  
**Dyddiad marw:** 1975  
**Priod:** Muriel Probert (née Taylor)  
**Rhiant:** Albert John Probert  
**Rhyw:** Gwryw  
**Galwedigaeth:** gwleidydd Llafur  
**Maes gweithgaredd:** Gwleidyddiaeth a Mudiadau Gwleidyddol  
**Awdur:** John Graham Jones

Ganwyd ef yn Aberdâr ym 1909, yn fab i Albert John Probert, o Dafarn Penlan, Stryd Regent, Aberaman, Aberdâr, tafarnwr lleol, a'i wraig. Derbyniodd ei addysg yn Ysgol Ramadeg y Bechgyn, Aberdâr. Dechreuodd ar ei yrfa fel swyddog llywodraeth leol o fewn adran dai Cyngor Dinesig Aberdâr ym 1928. Daeth yn gyfrifol am archwilio'r gwaith cadw ac atgyweirio ar ystadau tai Cyngor Dinesig Aberdâr. Yn ystod yr Ail Ryfel Byd gwasanaethodd o fewn Mintai wirfoddol wrthgefn yr Awyrlu Brenhinol a bu'n gwasanaethu yn yr Alban, yr Almaen a Denmarc. Roedd yn aelod gweithgar o Undeb y Gweithwyr Trafnidol a Chyffredinol a gwasanaethodd fel ysgrifennydd Cyngor Llafur a Masnach Aberdâr, 1951-54. Roedd hefyd yn aelod o bwyllgor ar gyflogaeth leol a phwyllgor ar les yr henoed.

Yn dilyn marwolaeth yr AS Llafur dros Aberdâr [D. Emlyn Thomas](#), etholwyd Arthur Probert yn AS Llafur dros yr etholaeth mewn is-etholiad ym mis Hydref 1954 a daliodd ei afael yn y sedd nes iddo ymddeol o'r senedd yn Chwefror 1974. Yn is-etholiad 1954 ei wrthwynebwy'r oedd [Michael Roberts](#) ar ran y Ceidwadwyr a [Gwynfor Evans](#), llywydd Plaid Cymru ers 1945. Roedd Probert yn ysgrifennydd i'r Blaid Lafur Seneddol Gymreig, 1955-59, yn chwip yr wrthblaid, Tachwedd 1959-Rhagfyr 1960, yn aelod o'r Pwyllgor ar Gyfrifon Cyhoeddus, 1964-66, ac yn ysgrifennydd preifat seneddol, 1965-66, i'r Gwir Anrhydeddus Frank Cousins, y gweinidog dros Dechnoleg. Roedd hefyd yn aelod o Banel y Llefarydd o Gadeiryddion, 1966-74, ac etholwyd ef i gadair yr Uwch-bwyllgor Cymreig ym 1970. Yn gyffredinol roedd yn dueddol o wrthwynebu polisi amddiffyn Hugh Gaitskell, ac ar un adeg ymddiswyddodd mewn protest yn erbyn polisi niwclear y Blaid Lafur. At ei gilydd roedd parch mawr iddo oherwydd ei waith fel AS etholaethol da a oedd yn cyfarfod ei etholwyr yn rheolaidd. Ac yntau'n ymwybodol o'r cwmp ym mhoblogaeth yr ardal a'r diffyg cyfleoedd i bobl ifanc, bu Probert (ac [S. O. Davies](#), yr AS dros Ferthyr Tudful) yn pwysu ar y naill lywodraeth ar ôl y llall i gyflwyno ffynonellau newydd o gyflogaeth i mewn i'r etholaeth. Priododd ym 1938 Muriel, merch William Taylor, Abercwmbוי, Aberdâr, a bu iddynt ddwy o ferched. Eu cartref oedd Allt Fedw, Abernant, Aberdâr. Bu farw Probert yn sydyn yn ei gartref ar 14 Chwefror 1975 ac olynwyd ef gan [Ioan Evans](#) yn AS Llafur Aberdâr. Amlosgwyd ei weddillion yn amlosgfa Llwydcoed.

### Awdur

Dr John Graham Jones

### Ffynonellau

*Who was who?*

*Etholiadau'r Ganrif, 1885-1997* (Talybont 1999)

*Welsh Hustings - 1885-2004* (Rhydaman 2005)

*Western Mail*, 15 Chwefror 1975

*Mynegai Bywgraffyddol W. W. Price*

### Darllen Pellach

Erthygl Wicipedia: [Arthur Probert](#)

### Dolenni Ychwanegol

Wikidata: [Q4800031](#)

Dyddiad cyhoeddi: 2008-09-17

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

